

Jahresbericht 2022

Vo der Trachtegruppe Gurzele

O afangs Jahr 2022 het Corona nid zue gla das mir üses Vereinsläbe normau hi chönne geschtaute.

Mir hi nid törfe afa singe u tanze, u d Houptversammlig hi mir o müsse verschiebe.

Am 16. Februar isch der Vorstang zäme cho für d Houptversammlig u z ganze Jahr z plane so guet das gange isch.

Üses Ehremitglied Kläry Burkhalter isch am 21. Februar gschtorbe. Kläry isch zletscht no im Solina z Stäffisburg gwohnt. D Lisabeth u i his churz vorhär no bsuecht u ganz e zfriedene Namittag zäme verbrunge.

So ändlech dörfe mir wieder ga Singe! Am 23. Februar si mir mit de Singprobe gschtartet.

Für ds Jodlerfescht z Ins hi mir scho agmäudet gha so das es jetz het ghisse üebe, üebe, üebe!

Üsi Stimme hi grad chli Taining brucht nach dene länge Pouse.

Am 24. März het der Vorstang d Delegierteversammlig vo der Gürbetaler Jodlervereinigung düregführt im KBZ Seftige. Wieu z Jodlerträffe im 2021 bi üs isch gsi hi mir di DV müsse organisiere u de Mitglieder es Znüni serviere.

Es het Händöpfusalat, Seftigerwurscht u Züpfe gäh u zum Dessär Schwarzwäuderturte.

Üsi Mitglieder si o gewiut gsi z Trachte Zmorge dürezführe!

Das het am 3. Apriu e grossi Schar Bsucher azoge. Weme de scho wieder inisch het i Usgang dörfe.

Es isch gäng e sehr grossi Arbeit für aui. Danke no inisch vieu mau für öiie Isatz.

Im Doorfsaau vom MZG hi mir am 8. Apriu üsi Houptversammlig chönne nachehole.

Leider hi drü Mitglieder der Ustritt usem Verein bekannt gäh uf die HV 2022.

D Rosmarie u der Markus Schneider vom Chörli u d Liliana Rothacher vo der Tanzgruppe. I danke a dere Steu no inisch für di schöni Zyt mit Öich u füre Isatz für Trachtegruppe Gurzele.

Es isch süsch aus guet düregange, sogar am grosse Bitrag us der Vereinskasse a üsi drü tägegi Reis isch zugschtimmt worde.

Z Hanny Burri fiiret sis zwänz Jahr Jubiläum aus Dirigäntin i däm Jahr.

Mir schänke am Hanny di drütägegi Reis us der Vereinskasse.

Zum Znacht hets Härdöpfusalat, Schwartewurscht u Züpfe gäh. Zum Dessär Glace u Gebäck. D Schwartewurscht isch vom Hanny gschpändet worde wius üs nid het chönne ilade a sim Geburtstag. Danke vieu mau!

Ds Expertiesesinge z Riggisbärg isch am 6. Mai düregführt worde.

Jetz hi mir afe inisch üses Wettlied chönne ga vortrage.

Am 18. Mai hi mir ganz e interressanti Prob gha mit em Ueli Moor für no am schöne Daheim zschaffe wo der Ueli komponiert het u mir am Jodlerfescht wi ga singe.

24. bis 26. Juni Jodlerfescht Ins. Am Samschtigvormittag hi mir i der Chiuche üses Wettlied törfe vortrage.

Mir hi natürlech scho Früüd gha das mir i der Chiuche hi törfe singe. Der Vortrag isch üs guet glunge u mir hi am Sunntig es 1 törfe i Empfang näh. Das isch natürlech o für üser drü nöie Mitglieder bsungers schön gsi.

Es isch es schöns chli chliners Jodlerfescht gsi i däm schöne Ankerdorf.

Aber leider het der Busverchehr zu de Parkplätz nid funktioniert i der Nacht u drum isch du das ömu für Hans-Ueli grad chli horror gsi, mit erbräche u Härzproblem vor luter Ufregig.

Am Sunntig hi mir das sehr guet no chli dörfe Fiire im Höfli z Seftige.

Danke aune füre Isatz u o de Tanzlüt wo üs ungerstützt hi z Ins u am Sunntig si cho gratuliere.

Üses Brätle isch am 8. Juli i der Gürbebedi gsi.

Es isch eifach es schöns Plätzli dert.

Mir hi e gmühtleche Abe zäme verbrunge.

Ferie hets numme churzi gäh.

Mir hi müesse üebe für die Aläss düre Herbscht.

Ds Längebärger Jodlerchörli het z Gürbetaler Jodlerträffe am 11. Septämber z Oberbalm düregführt.

I der Chiuche hi mir es schöns Daheim u d Eltreiebi dörfe vortrage.

D Feschtwirtschaft hi si i der Turnhaue chönne ha u der Gsammtchor aus Abschluss ufem Turnplatz bi schönstem Wätter.

Roki Reise Heimbürg het üs e wunderbari drütägegi Reis zämegschteut im Appizäuerland vom 30.9. bis 2.10.22

Uf der Reis am Appizäuerland zue hi mir im Muotatal Mittagshaut gmacht. Dert het üs e Wätterschmöcker vieu luschtegi Müschterli verzeut.

Zwe Musikante hi du no für Ungerhautig gsorgt u die wo hi möge hi sogar es Tänzli gmacht.

Z Appizäu hi mir im Hotäu Hecht dörfe üser Zimmer bezieh.

Dert hi üs Eckerts scho erwartet. Si si mit üs die zwe nächschte Tag ungerwägs gsi.

Nachem Nachtässe si mir i verschiedene Gruppe no chli ga ds Dorf besichtige u es Schlummertrünkli näh oder o mehreri.

Der Samschtig isch vou düre programmiert gsi. Das isch z inzige wo chli schad isch gsi.

Zersch si mir ga Biber bache. Jedes het si Biber dörfe mache u när nam bache mit Hei näh. Das isch luschtig zue gange. Der Biber isch auso super guet gsi!

Nach churzer Pouse isch du witer gange für di inti Häufti mit Dorfführig u für di angere i d Appizäuer Chrüter Fabrik.

D Chrüterfabrik isch sehr interessant gsi u am schärme.

Natürlech het o Degustation nid törfe fähle.

Aschliessend hi mir tuschet mit de Gruppe u die Dorfbesichtigung isch bi Rägewätter chli lang gange u aui hi chaut gha.

Aus Abschluss hets no es Aperö gäh dusse.

Das het du nid grad für gueti Stimmig gsorgt u mi isch möglichscht schnäu is Hotäu sich ga ufwärme.

Lang hi mir aber nid Zyt gha wieu mir uf Teufen gfahre si ufe Betrieb Schnuggebock ga z Nacht ässe.



Das isch de es Erläbniss gsi, der ganz Hof, die vieu aute Sache wo me het chönne entdecke u o ds Ässe inklusiv der Bedienig.

Es Grüppli Jungi vom Verein si no nid müed gnue gsi für ga z schlafe u si mit em Taxi no uf Brülisau ane Chiubi.

Am Sunntigmorge het z Wätter leider o nid besser usgseh.

Der Usflug ufe Chronbärg isch aber buchet gsi u mir si mit der Gondle dert uche gfare. Gseh het me nüt wägem Näbu u gluftet hets o starch. Z Mittagässe isch o fausch bschteut gsi vom Tourismusbüro, aber es het haut du wieder Chähörndli gäh wie scho am Samschtigabe.

D Gondubahnfahrt für wieder ache isch grad chli chutzelig gsi bi däm starche böhige Luft.

Dunger hi mir üs vo Eckerts verabschiedet. Si si wieder gäge Dütschland zue u mir uf der Outobahn richtig Bärn.

Es isch e schöni, abwächsligsriichi, interessant Reiss gsi.

Danke vieu mau am Jürg Fahrni für aus z organisiere u üs so sicher z schofiere.

Sunntig der 16. Oktober hi mir wieder dörfe häufe z Jantar Matineekonzärt düreführe. Zwüsche de zwe Konzärtblöck vo der Blaskappäue hi mir föif Lieder gsunge.

Das isch für üser Stimme grad a der Gränze gsi ohni Pouse zwüschiche. Ds Vreni Blesi het üser Lieder schön u usführlech agseit.

D Feschtwirtschaft hi o mir vo der Trachtegruppe organisiert, mit Mittagässe u Turte zum Dessär.

Schad das fasch keni Bsuecher si cho, aber si söte haut meh Wärbig mache.

Der Ärntedankgottesdiensch i der Chiuche z Gurzele isch am 30. Oktober gsi. O hie hi mir dörfe ga Singe.

Aschliessend hets bi schönem Herbstwätter ufem Chiucheplatz no es feins Aperö gäh.

Jetz hi mir o wieder üsi Ungerhautigsabe dörfe düreführe.

Mir hi üs sehr gfröit druf u si gschpannt gsi ob äch di Bsucher de o chömme.

D Houptprob am 24. Novämber isch guet gange!

Samschtig, 26. Novämber, Donnschtig, 1. Dezämber u Samschtig, 3. Dezämber si Datum vo üsne Abe gsi.

A aune drei Abe isch der Saau gäbig vou gsi. Das het üs natürlech sehr gfröit.

Mit üsne Lieder, de Trachtetänz u am Theater Dopplet so guet vor Claudia Gysel hi mir es abwächsligsriichs Programm zäme gschteut gha wo de Bsucher het Frööd bereitet.

O üsi Feschtwirtschaft het drei ganz erfougriichi Abe gha, u Tombolalos si schnäu verchuft gsi.

Danke aune ganz härzlech für dä gross Isatz!

D Schuel het mit der Musiggruppe mitghuefe d Seniorewiehnachte düreführe am 14. Dezämber.

Si hi grad der Afang gmacht, der Pfarrer Andrea Fabretti het zwo Wiehnachtsgschichte vo der Marta Wild vorgläse u z Hanny het üs uf der Handorgele begleitet zu de zwü bekanntische Wiehnachtslieder.

Zum Znacht hi aui es Paschtetli übercho.

Im zweite Teu hi mir no gsunge u tanzet.

Es isch gwüss veiechli spät worde bis du di Seniore gäge hi zue si.

Hür hets o no e dritte Teu gäh. Wieu Rohrer's hi Hochzytstag gha het Aschi no feini Turte bache gha u mir hi no chli dörfe schlemme u gniesse.

Danke vieu mau für di feini Überraschig.

Am 28. Dezämber hi mir fürs Vereinsjahr la uszklinge no der Autjahrshöck im Schützehuus Mettle düregführt.

Auso besser gsit Tanzgruppe het dä organisiert.

Zum Znacht hets es Pasta-Buffer gäh mit drei feine Sauce vom Restaurant Höfli kochet.

D Anita isch i däm Jahr 50zgi worde u der Hanspeter während de Ungerhautigsabe 70zgi. Us däm Grund hi si je e grosse Bitrag a das Nachtässe zaut. Danke vieu mau!

Z Dessär-Buffer isch vo Vreinsmitglieder gschpändet worde.

Es isch e zfriedene Abe gsi u schnäu spät worde.

Danke vieu mau der Tanzgruppe für parat z mache u ufzruhe.

So isch doch wieder es abwächsligsriichs Vereinsjahr z Änd gange.

I danke a der Dirigäntin Hanny Burri u de Tanzleiter Daniela u Ernst Rohrer ganz härzlech für dä Isatz dürs ganze Jahr. Schön verlieret dir Geduld nid mit üs!

De Theaterlüt, der Theaterkommission, der Musigkommission u de Rächtnigsrevisore o es grosses Merci für öii wichtige Ufgabe i üsem Verein.

Natürlech o Öich aune Vereinsmitglieder danke vieu mau für öii Mithiuf das das Vereinsschiffli nid unger git.

Es ganz grosses MERCI git a mini Vorstandslüt ! Es isch schön mit Öich zäme zschaffe.

Für z nöiie Vereinsjahr wünsche i Öich gueti Gsundheit u vieu schöni, gmühtlechi u erfougriichi Erläbnis mit der Trachtegruppe Gurzele.

Im Jäner 2023

Öii Präsidentin

Marianne Reust